



Gaurav-i NE nung ozüing alema
nagmati shishilembaba ashishi

Trump-i Canada den shishilempa
masütsü amokmerener



CM aser kinungtsüi CS atema tepila sentong ayongzük



Kohima, Chiteni/July 31 (TYO): Nagaland indang Chief Secretary mapa nungi anisüngzüksang Dr. J. Alam, IAS nem akhum agüja tepila sentong ka Chief Minister Dr. Neiphiu Rio aser pa kinungtsü nati State Banquet Hall, Kohima nung July 31, 2025 nü ayongzüka liasü.

Dr. J. Alam dak lenisüba nung tatishitsü tajung aliba aser Nagaland nung tang tashi loktiliba nung mepetmesü adoka aliba ajanga nüburtem tang tashi timtema liaka pai bendanga agütsür alakteta tenzüka asoshi Chief Minister, Dr. Neiphiu Rio-i pelaba lemsatepa liasü.

Pai Dr. J. Alam ya tesüngjem aser shisatsü tajung agi sünga aliba nisung ka lir aser tensa ajak nung pai tajungtiba nung inyak, ta ashi.

COVID-19 pandemic, State nung mezüngbuba Medical College amenokba, State Solar Mission amala nung outgoing Chief Secretary-i tongti shilem agiba aser item mapa asangsang kumdaktsüba indanga Dr. Rio-i lemsatepa liasü.

Chief Secretary ka ama Naga nunger tenzüka mapang pa kinungtsüi pa maneni yariba aser ajungmesoba atem pa kinungtsü danga CM-i pelaba lemsatepa liasü.

Dr. J. Alam-i iba sentong nung jembidang Chief Minister-i iba ama tetushi tulu agütsüba aser tongtipang mapatem pa dak temulung lema nungloksüba asoshi pelaba lemsatepa liasü.

Nagaland nung aliba nüburtemi pa dang temeim sayuba aser pa Naga nunger ama bilemdaktsüba asoshi Dr. J. Alam-i pelaba shisem.

Nagaland tenzüka ya pa takum nung asendenshiba mapang ka liasü aser iba mapang lenir, teamwork aser nübur tenzüka nung bendanga agütsüba tetetzü chichiba pa dang sayu, ta ashi.

Chief Minister, Deputy Chief Ministers, Council of Ministers, Advisors, Members of the Legislative Assembly, civil aser police services nung külem tenzüker temi amalitep akaba aser yaritepba asoshi pelaba metetdaktsü aser state sorkar tenzüka ya pa asoshi maongka tulu alitsü ta ashi.

Nagaland asoshi jenjang tajungtiba arutsü ta amanga ni state yutsür aor, kechiaser Naga nunger tasü tait, sobaliba tajung lir aser institutional capacity ainer aser CM dak mangdang tajung lir, ta J. Alam-i ashi.

Sentong tembanga TaFMA ajanga "Nagaland as You'll Remember" ken tenloksü.

Nagaland-i Dr. J. Alam den salem shitepogo

Kohima, Chiteni/July 31 (TYO): Nagaland Chief Secretary mapa nungi anisüngzük angur Dr. J. Alam, IAS nem akhum agüja tepila sentong ka July 31, 2025 nü Nagaland Civil Secretariat, Kohima nung ayongzüka agia liasü.

Chief Secretary mapa nungi anisüngzük angusang Dr. J. Alam, IAS ajanga tepila o jembidang temulung taroktiba nungi pelaba lemsatep aser iba sentong ya pai nübur tenzüka aruba tenüngsang benjong ka lir ta ashi.

Taoba Nagaland Chief Secretary Temjen Toy ajungbena asüba sülen pai January 29, 2021 nü Nagaland Chief Secretary mapa agizük.

Dr. Alam-i pa Chief Secretary ka ama inyakba mapang files nung meyongnem agütsüba mesüra senden amenba ya tongtipang masü saka pai state asoshi temelenshi tajung koma bener arutsü, aji tongtipang lir, ta ashi. Pa melensangi Nagaland yimchiyimjung asoshi maneni meranga inyaktsü tamang akar, ta pai ashi.

Pai sorkar ketdangsür

ajunga dang Nagaland nung aliba nüburtem ochi mulungsentsü nung maneni tenzüksü ajungshia liasü.

State sorkar tenüing nung Additional Chief Secretaryand Finance Commissioner, aser Chief Secretary tasenba, Sentiyanger Imchen, IAS-i jembia liasü.

Tena ya batch mate officer asünung, Imchen-i Lal Bahadur Shastri National Academy of Administration, Mussoorie nung lanur officers ama Dr. Alam den külemi aliba aser tang state sorkar nunga pei tashi yari tenzüka mapang ajangshiba lemsatepa liasü.

Nagaland nung Dr. Alam-i sorkar tenzüka otsü tongmelang agi lemsatep aser state administration nung temelenshi tejangja bener arua aser Nagaland nung nüburtem takum nung temelenshi bener aruja mera agibatam, talisa sorkar mapa inyaker mapa nungi anisüngzüka anogo matongdang pension papers benteta sanctions sür ataba, Nagaland Solar Mission aser Nagaland Skill Mission yanglua semzüka aser

lanurtem nem skillset shidak agütsüba indang lemsatepa liasü.

Sentong nung Principal Secretary, Y. Kikheto Sema, IAS menden liasü aser IAS Association, IPS Association, IFS Association, NCS Association, NPS Association, NSS Association, CANSSEA, FONSESA, NSSSA aser Grade IV Association (Secretariat), Director General of Police, Rupin Sharma, IPS aser Assistant Chief Engineer CAWD, Er. Sungtiba Amer nungeria o tatsütsü jembia liasü.

Home Commissioner, Anoop Khinchi, IAS ajanga melepzüng o jembi, kong state chaplain Rev. Izieteilung Tering-i sentong nung temoatsü jazüka sarasadem aser NCSA band ajanga temeja ken ka tena liasü. Iba sentong nung AHODs aser HODs, department balala nungi ketdangsürtem, kinunger aser temulungertem dena liasü.

Dr. J. Alam-i 1991 küm All India 12th Rank nguteta Indian Administrative Service (IAS) nung züngsem kuma Nagaland State Cadre lemsütsü.

Immigration Control Task Force amenoktsü: NNPGs

Dimapur, Chiteni/July 31 (TYO): Naga nunger nütsüng yongsük, socio-economic aser yimtenren tsütsü timtem ajurutsü tejangja lir ta ajiteta, Naga nunger aliba tesem nung illegal immigrants azüoktsü aser iba dak sendakba ken o tem bentettsü mechi Immigration Control Task Force amenoktsü, ta Working Committee, Naga National Political Groups (Neokpao) ajanga sangdong ka

nung ashi.

Naga nunger aliba tesemtem nung kin balala putepa aliba nung ajemdaker tamangba yimsü balala akumtsüboa, teladak tangatetba ya religious fundamentalism asoshi mashi lenmang nung mamshidaktsütsü, anungji WC ajanga Madrasas kata amenoktsü memelatsü aser Naga nunger aliba tesem nung Madrasas kar danga lira itemjia

shibangtsütsü, ta sangdong ajanga ashi.

Kecha yimya nunga Jihadist ideology ajungmesoba nung Masjids tem mamshidaktsütsü, aser iba atema Naga areas nung Muslim Councils dang iba dak sendakba ken o nung Task Force den amalitep akatsü metetdaktsür, ta WC, NNPGs (Neokpao) sangdong ajanga ashi.

WC ya tang atema masü tarutsü asoshi nukla tajung yur inyaktsü temulungtetba nung lir. Anungji ozüing agi melaa aliba senso tem menüngdakba nung timtem ajuruba nungi kumzüka alitsü mechi migrants tem jangjateta aser tenüing zülüokba mapa inyaktsü.

Anungji kin balala lenirtem, talisa sectors aser yimtsüng ketdangsürtem dang Task Force den amalitep akatsü metetdaktsür.

WC inyakyim ya Muslim nunger anema mesüra tamangba yimsü temeja ka mesüra telok ka anema inyaker ta mangatettsüla, ta WC, NNPGs (Neokpao) sangdong ajangasa ashi.

Illegal immigrants anema lungjemer nokdaktsü ayongzüker: NPF

Dimapur, Chiteni/July 31 (TYO): Naga nunger li, maitsü aser tarutsü yimtenren wazüka ayuba nung Naga People's Front (NPF) teti tasü ita nokdaka arur. Tanübo external aggression dang tebilemstsü tuluba atema ola adoktsüsa akumer aser ibaji Nagaland nung illegal immigrants maziüki timba akumba ya lir, ta NPF sangdong ka ajanga ashi.

Nagaland ajunga aser talisa Assam den arütsüa aliba Peren, Dimapur, Niuland, Wokha, Mokokchung, Longleng aser Mon district nung illegal immi-

grants - talisa Bangladesh nungi - temi timtem agütsüba ya taoksatsüka kumogo.

Item ya khen atema aayangertem kisüing masü, aika asen rongsenketzüing, markets, trade unions, ali kibur aser asen electoral rolls nunga kanga junga amenteta lir. Asen tenük agi ngua Nagaland nütsüng yongsük tsütsü kanga melenshiogo, ta ashi.

Item nisungtem ya asen li nung tera yanga meliaka mesüra ozüing agi mela meliaka tanübo businesses lapoka lir, ali alir,

kuli kaket tem yanglusar aser taila kaket tem amshia voters ama tenüing zülüoker. Ibai asenoki ajangshitsü südi ta bilemba ka masü, asangsang lir.

Iba tebilemstsü ya kin mesüra tamangba yimsü nung ajemdaka lir ama mebilemstsüla. Ibai lisopur temeden, ali aser maitsü kumzüka ayutsü asoshi shidak nung nokdakba indang lir, ta NPF sangdong ajanga ashi.

Anungji talisa Dimapur aser arütsülen tesemtem nung Inner Line Permit (ILP) akang-akanga aser shidak amshitsü

ayongzüker. Arütsü azüokba inyakyim tajungba kumshitsüla, police outposts nung nübu aser resources tasen peria yoka tashi itshitsüla.

Naga nunger temeden aser tarutsü jenjang wazüka ayutsü asoshi bendanga agütsür inyaktsü ta NPF-i maneni jangjatsür. Kasa mapang civil society, yimten yimsüsürtem aser nüburtem dang kanga ilonga aserlungjemer iba illegal immigration tebilemstsü anema nokdaktsü ayongzüker, ta NPF sangdong ajangasa ashi.

Kohima SP-i gari senzügenpongtsü tetuyuba agütsü

Dimapur, Chiteni/July 31 (TYO): August 1 nü nungi 15 nü tashi Indira Gandhi Stadium, Kohima nung Dr. T. Ao Trophy 24th Inter-District Football Championship 2025 asayatsü aliba dak sendakba nung gari senzügenpong nung kecha tetsükdaktsü madoktsü aser gari shitak anena ayutsü atema Kohima-i SP-i tetuyuba kar agütsüogo.

Gate No. 1 Protocol: Gate No. 1 ajanga VIP, ketdangsürtem aser asayartem dang senzügenpongtsü. Item

garitem ya venue nung pei tata tesem nung dang anentsüla. Asayartem anir senzüba bus tem asayartem toktsüba sülen Hall-A anasa anentsü.

Gate No. 2 Protocol: Nüburtem senzügenpongba garitem ajak Gate No. 2 ajanga senzügenpongtsü. Item garitem ya Hockey Ground nung parking atema latettsür aliba tesem nung anentsü.

Shuttle Bus Service: Shuttle bus service (city bus) ka High School Junction aser IG Stadium na tsüngda inyaksangshitsü.

Item bus tem ya Gate No. 2 nungi aitsü aser Hall-A anasa anentsü.

Parking Enforcement: Asaya reprangi arurtem indang gari anentsü atema tesem mekazükja lir aser National Highway (NH) nung gari anentsü memelatsü. NH nung anena aliba kibur maliba gairtem bener aotsü aser bener aoba taah ya gari kiburi agütsütsü.

Iba dak sendakba nung Kohima Traffic Police-i ajak dang teka amteper inyaktsü mepeshia metetdaktsüogo.

PCC nung district outreach program ayongzüka agi

Dimapur, Chiteni/July 31 (TYO): EPFO Special State Office Dimapur-i ayongzüka July 28 nü Patkai Christian College, Chumukidema nung District Outreach Program (NIDHI AAPKE NIKAT) ka ayongzüka agiogo. Iba sentong nung employer, employee aser tanga stakeholder temi shilem agia liasü.

Sentong nung program Regional PF Commissioner-II Samuel Das den Enforcement Officer Kallal Bhattacharjee, aser SSA T.Livi nungeri Employees' Provident Funds & Miscellaneous Act, 1952 kübok Social Security dak

sendakba nung provisions, tajangzü, temeden & maongka balala indang tangazükba agüja liasü.

Employer, employee aser tanga stake holder temi ken o mejangjaba asüngdangbatem bentetja liasü. Sentong mapang EPFO indang Help Desk ka amenok aser iba ajanga züngsemtemi benokba ken o balala bentetja liasü.

Sentong nungsa Prayas inyakyim kübok Pension Payment Order Suwalemla Ao nem agütsü, shiba Nagaland Handloom and Handicrafts Development Corporation Limited nung inyaka liasü aser 2025 küm July ita 15 nü mapa

nungi anenogo.

Kasa mapang nung Nagaland kübok district balala nung Awareness sentong ayongzüka agitsü EPFO sentong lir. Employer aser Employee tem dang EPF dak sendakba ken o tem atema EPFO Dimapur office semdangtsü metetdaktsüogo, koba 1st & 2nd Floor, 218, United Colony, Half Nagarjan, Dimapur (Hombur nungi Hokolbar: 9:30 am - 5:30 pm) nung lir.

Maneni office den phones aser emails: 6909318701/6909318702 Email:sso.dimapur@epfindia.gov.in ajanga tongteprateptettsü, ta metetdaktsüogo.

SBC tenzüka mung den Sobaliba mung repa amung



Servanthood Bible College tenzüker küm 37 ajungbamung den külemi Sobaliba anogomung amungba sentong nung laishirtemi shilem agiba noksa ka yangi angur. (Dimapur, July 30, 2025.)

Dimapur, July 31 (TYO) : Dimapur nung Servanthood Bible College tenzüker küm 37 buba ajungbamung den külemi Sobaliba sentong dena repa yashi July 30 nü mungogo. Iba sentong nung tongti tejaoker Nagaland nung MLA Wb. Kuzholuzo Nienu liasü.

Pai iba sentong nung jembidang, "iba sentong nung arua shilem agitsü ni temsüa ali asü mali ta kūsasa kanga shisadanga liasü aser ibai Tsüngremer sentong ta

angateta ni shilem agitsü mulungtet," ta metetdaktsü.

Iba Servanthood Bible College ya mangdang tulu nung tenzüka , Tsüngrem tenzüker asür Tsüknungsangba nem tenüngsang agütsü aser pa iba alima nungi pilaa oaga tanü tashi kanga dang temoatsü aser takok nung iba college ya Wb. Moa Jamir Principal ser anir aruba asoshi Wb. Neinu-i tenüngsang agütsü. Iba SBC nung ya Naga kin balala nungi arua Tsüngrem o bushia

azüngertem dang temulungtetba aser tangtetba tajung yur ajemalua Tsüngrem tenzüksü asoshi paiza ajungshi.

Paisa par tetsüteboutemi Yisu temeim agizüka amangba temoatsü nung pai yimten nung shilem tajung agitettsüsa Tsüngremi maongka agütsüba tepela laishirtem den lemsatep.

Iba sentong nung kaketshirtemi sobaliba ken aser yartsüngsang balala sayua shilem agia liasü.

Zunheboto nung tetushi agütsüba sentong ka agi

Dimapur, Chiteni/July 31 (TYO): "Sampoorna Abhiyan Samman Samaroh" ta nüngja agütsür Multi-Purpose Hall, Zunheboto nung July 30 nü tetushi agütsüba sentong ka agiogo. Iba sentong nung MLA, Er. Picto Shohe alaketa jaoker liasü.

Iba sentong ya Akuhaito Aspirational Block dak rangloker agi, koba Block initiative kübok frontline worker aser Self-Help Groups (SHGs) tem mapa tajung atema tenüngsang agütsütsü aser parnok ajungmesotsü atema lir.

Sentong nung o jembiba mapang Shohe-i, terenlok

terabo kar saka 2023 küm iba sentong amenokba sülen Akuhaito Aspirational Block-i ajangzüka tongibang mapa kecha mangaoka mali, ta ashi. Iba sentong amenoker küm asembuba süaka block nung tang tashi tenüngdakba infrastructure tem agi anünger, kong bus service dena maliba aser lenmang kanga majungba densema lir. Atoizu Block, koba backward ama züngoksema lir, iba block kübok yimtsüng 16 aser jila pezü lir. India nung block 500 nung iba block ya 8buba nung lir.

Sampoornata Abhiyan nung

shilem ka ama block ketdangsür aser frontline worker tem nem tetushi agüja liasü. Tetushi agütsürtem rongnung District Soil Conservation Officer, Junito K. Zhimomi, CDPO, Nikuto Chishi, CDPO, Dr Gihuka V. Chishi, Medical Officer, Gokheli, Block Programme Manager of NSRLM, Mugholi Jakhalu, Community Health Officer, Lokobomi, Tolika Z. Katty, Anganwadi worker, Nishili, Anganwadi worker, Naghuto village, Vekuho New Village nungi Avini Yeptho SHG nunger densema liasü.

Tongpangmei aser Vino-i People's College asoshi otsü tasen ka yangluogo



People's college nung graduation den repsema tangar dang alaketa takok angur nem tetushi agütsüba sentong agidang tangokba noksa nung angur. Mokokchung, 30th July, 2025

Mokokchung, July30

(TYO): People's College, Mokokchung nung graduation den repsema tetushi agütsüba sentong ka parnok college senden kilem nung 30th July nü agiogo.

Graduate asür parnok 7 rongnung taküm par college asoshi jangratemtsü aser otsüsütsüsa Nagaland University-i Choice Based Credit System kübok agiba 2025 undergraduate tatidang general category nung Longkhum nung Tongpangmei-i Top 5 (GPA 7.15) aser Suruhuto yimer Sb. Vino Awomi-i Top 7 (GPA, 7.04) nung takok nguteta college nem konang bener arutsüogo. Nagaland University kübok UG (CBCS) tatidang nung top 10-i aibaji par college otsü nung ibai mezüngbuba asütsü.

Tanü iba sentong nung tetushi tejaoker Mokokchung DC, Ajit Kumar Verma IAS-i jembidang, takok tajung anguba asoshi graduate asür kaketshir, college nem konang bener arutsür topper ana den college ketdangsür, tesayur aser tsürabur ajak nem tenüngsang agütsü. Takok tulu anguba yagi ano iba college ya tarutsü nung tongtibang riju ka akümtsü aser tangar menepa aintsü nükla tajung sayur, ta ashi.

Pai kaketshirtem dak lidaktsünüba jakla kar ashidang, graduate asüba mesüra degree anguba kisüng jagi nisung ka taküm teperi makümer, anungji, taküm nung mapa balala takok ngua aotsü asoshi ajemaluba den khuret benteta aser nükjidong tejangja yur asalentong tajung nung na kechi kümnür iba asoshi merangtsüla,

ta ajungshi.

Alima nung kechi ataloker, alima koma aor, ibaji metetba den angazüktsü aser angatettsü merangang, kechi südir süaka, kanga junga angazüktsü tongtibang lir. Nai taküm nung langka kar ajangzüka, aji na atema dang masü saka lokti asoshia tajangzü, ta paiza ayongzü.

Board of Governors, chairman, Akok Walling-i tajungshi o jembidang, tanü takok tulu anguba ya college asoshi otsü tasen ka lir. Iba yagi sayur, takok tulu angutsübaji college nung nüngdakba (infrastructure) peria alibaji masü saka mulungsentsüji tongtibang ta angateter, ta ashi.

Ita-i tuaka nenoki tera (root)ji tamatok, kechiyong tera ji kanga tongtibang lir, ta pai tatishitsü kar bener arua lemsatep. Bachelor degree anguba ya mezüngbuba jenjang lir, shisatsü tarokba bushitsü asoshi nenok ya tang tetenzükerba lir, nenok ano talangka jajatsüba lir. Jajayonga aodangji tensa tia balala ajurutsü, saka temulungtetba tulu nung nükjidong matalok tashi jajatsü asoshi paiza kaketshirtem ayongzü.

Graduate asür ajak tenüng nung Tongpangmei-i shilem agia jemb. Tesayur Alemjungshi-i takok angurtem asoshi mejeta temoatsü meshia sarasademtsü. People's College Principal, Dr. T. Amongla-i tarur ajak pela-a agizük aser tesayur Dr. Obendangla iba sentong nung menden liasü. Tesayur Imsutulai temoatsü meshia sarasademer sentong tenzüker aser 1st Semester azünger Panggo-i tenüngsang agüja sarasademer tembang.

FAC nung tetushi agütsüba sentong agi

Mokokchung, Chiteni/July 31 (TYO): Fazl Ali College, Mokokchung nung July 31 nü College Auditorium nung kaketsü shisatsü bushiba aser tanga extracurricular inyakyimtem nung takok tajung anguba kaketshirtem nem tetushi agütsüba sentong ka agiogo.

Sentong nung Principal, Dr. I. Wati Imchen-i o jembiba mapang kaketshirtemi meranga inyakba atema parnok nem tenüngsang agüja liasü. Sentong nung student body-i ken tajung ka aten. Tetushi agütsüba sentong ya Award Committee-i ayongzüka agi, kong college nungi Nagaland University

CBCS topper tem aser Miss Mokokchung, 2025 akokla nem tetushi agüja liasü.

Department of English nungi Nagaland University CBCS Topper (Rank 4) Akumienla-i tetushi agizükertem tenüng nung o jemb. Kasa mapang nung Miss Mokokchung 2025 Miss Bendangienla-ia o tatsüka jembia liasü. Lai teyari balala asoshi pelaba lemsatepba den kaketshirtem ajungshia liasü.

Iba sentong ya Associate Professor, Head of the Department of English T. Imsunaro Ao-i Tsüngrem temoatsü meshizüka sarasademer tembanga liasü.



TIR YIMYIM

YIMOBILEM (EDITORIAL)

DIMAPUR

ROGONÜ

LUROI 01, 2025

Tsüngrem arua amungba mung

A tangji, asen Aotsür Aortem ya Tsüngrem metetba nübor, anungji inyaksangshi aser benjongbentsü ajak nung Tsüngrem tama südaktsür Tsüngrem den aoba Ao kin lir. Ibayongji, alima ya lasasa poktetba ka masü saka teyanglur ka lir aser iba Tsüngremji Lijaba, pai alima nung alir ajak moatsür, anungji Pa akhümtsübutsula aser peladaktsütsüla ta asen tsüraburtemi angatet, anungji Lijabamung, Moatsümun aser Tsüngremmung ta temoatsü aser teyari ajak Tsüngrem nungi arur ta angateta Tsüngrem külema among. Aji oda, tanübo Lijaba tenüng agi Yihova Tsüngrem kümer, par chir asenok mimchir menen alangzüksü asoshi alimai yoksang Yisu Khrista dak amanga asenok alir. Atangji, anogo shia asenok mapanung Tsüngrem dang teyari aser temoatsü meshia alir aser Pa nem tenüngsanga agütsür. Ano, anogo trok mapaninyaker tenetnübuba nung anisüngzüka Tsüngrem külema amunger. Ajisüaka, akhi alu mapanung Tsüngrem tenüng sanga aser ano Pa dang temoatsü aser teküzmükba meshia benjong amungba anogotembo, akhi asen tsüraburtemi munga aruba Moatsü aser Tsüngremmung benjong ya dang liasü. Aji oda, tajung kaji asen tsüraburtemi külema aruba tsüngrem Lijaba, Anüngtsüba, Longkitsünga aser Meyutsünga ta tsüngrem tenüng aika amshia külema aruba nungi tangatetba dangi arua Abraham, Isak aser Yakob nungertemi külemba Yihova Tsüngrem dak amangaka, asenoki akhi mapang nungi munga aruba Moatsü aser Tsüngremmung benjong amungba sobaliba metoktsüi tanü tashi munga aruba ya asütsü. Atangji, akhi tsürabur mapang munga aruba tanga amungtsümuntema aika, tanüa asenoki mesentoki Tsüngrem külema amungtsüsa lir, ajisüaka itemji benjongmungbo masü, ashiko, ibayongji Moatsü aser Tsüngremmung dak alaka tanga tsüraburtemi munga aruba amongtsümongbo toktsü südi. Ashi, akhi tsüngrem külema amongba amungtsümuntem tanü asenok Khristan yimsü den apet munga arunungbo arogo nung lenirtem Tsüngrem külemba mapanung tali khuret benla aser nütsüngtema libaliro nung tali ashibanga tang dang nungibo ochi tashiba lila ta bilemer. Aji oda, tanüa asenoki Tsüngrem tashi aser temeim mamadoki Tsüngremmung amungba ya ajanga alima nung asenok ya asenoksasa alir masü saka asen taküm aser mapanung kibur ka lir, aji Tsüngrem, Pai asenok nem taküm temoatsü aser teküzmükba aser tanela tekümtet agütsür ta amanga asenoki Pa jaoka sarasadema amongba benjongmungji Tsüngremmung lir. Ashiko, karibo Moatsü aser Tsüngremmung ya limapur mung, anungji mamungtsüla ta bilema alitsüa akok, ajisüaka alu nung metsü ajak sarasadema rema yur, Yisu Khrista tenüng nung Tsüngrem dang aluji moajang ta sarasadema benjong amungba sobaliba aser tamangba yimsü ya koda tajung ta bilemdi. Kasaji, küm piyong anü tzünglu shitak yoka, alima yipru mopong, shiruru aser ozüsangnutem nungi alu kümzüka arur, joko alurotsü mapang atongdang, Tsüngremi moatsür aser ano Tsüngremiang moatsütsü ta amanga Tsüngrem jaoka amongba benjong, Tsüngremmung ya temeshi benjong ka lir. Tanü asenoki iba benjong amungdang, Tsüngremi asenok longtrok ajanga Dimapur aser Kohima tashi yamai longsua alitsüsa moatsüba ya mamadoki, iba temoatsür taochi aser temeim Tsüngrem jaoka, Pa nem tenüngsang agüja amungtsübaji kanga tongtiband asütsü. Asenoki Tsüngremmungbo among saka asenok den Tsüngrem maru aser maden ta ser mungra, aji Tsüngremmung masütsü. Aji oda, Tsüngremmung nung asenok den Tsüngrem adentsüsa asenok mulung aser sentong renemdi. Ashiko, tesem kar dak alaka benjongbo mamungtsüa akok, saka asenok den Tsüngrem arua amungba mapangji Tsüngremmung ya lir.

OLEMSABANG

Tsüngrem mong

N. Kika Pongen

Alemli Aortem Chungliyimti lima alidang alima ajak yanglusang Lijabai yim semdangtsü ta shin - o - ama parnok rongnung jembia liasu. Iba mapang Chungliyimti meta balala nungi arua semloka lidi ta asüba tia ka nung liasü. Ibayongji ainer nisung kaji shiba? Kong nungi aru ta memetetba mapangjia ajurunüa liasü.

Kenü anogo kanga tambur nisung ka süoshi teraksa sübor ajok amer tanem tanemi yimdaki aru. Pai ki shiai ao aser pa anendi ta asüngdang saka ki shia nungji par anemponger anungji ainer anentsü makok to langzü. Tambusangji shiba-er parnok memeteti liasu, tesüsa tambusangji yim tezülen ki teraksa tila kati aru. Iba ki nung lajar ayir ana liasu - tena tenüng Yarila aser teyi Yimitsüla liasu. Tambusangi tena den pa anendakjang ta asüngdang dang, ayirla ana jagi ashi, Obo, ozü kidang tachitsü tajemtsü kecha maka saka ki tazüng nung anentsüji oda anenang ta agizük. Anungji tambusang jagi kechisarina ni bena lir ta langzü.

Kodang tambusangji kidangi ait ayirla ana kito tesademba aküm. Soruchioktsü chipo tongdakdaksü aser tambusangi tekolak nung jangpen ka agizüker chibo nungji enoktsü. Iba jang jagi chipo sünga chi sorotet. Ano aonpu tongdakdaksü aser pai temokok nungi tip ka anakzüker enoktsü. Iba tip jagi shi aonpu sünga sotet. Item chiyongtsü jangratema chiyonger, parnok asem anisüngzüka mejanga ali.

Ayatrem tiyong nung ola ka - "Oh-he, Oh-he" ta angashi. Obo, ya kechi ola ta Yarilai asüngdang. "Remso ola-ar", ta tebo jagi langzü. Mapang tatsüka lir külen ano ola ka, "Külak -lak-lak" ta angashi, anungji ano ya kechi ola ta tantsülaisa asüngdang. "Ibai remsoa" ta langzü.

Anepdang yakta saker reprangdang nung kima tip külen ajong konger aika punga angu. Anogo ana tashi item chiyongtsü chiyonga among aser asemnü buba nung sünglang nung nokdaker tambusangi yimer alu ajak penzüa, ya shir lu ta asüngdang. Na manendaktsüba-er lu ta langzü". Alu iba nungji tsük tapong tang adokjangni ta atakatemdi, ta yimer ajak lu indang ashi. Tatem nung nena lu kong lir? ta asüngdang. Tantsüla taakba agi tena lu mesayutet. Idangji Yarilai komesü ka sünglang tapok nung tsükdaksü aser teyi tang komesüji abeni alutsü asüngdang. Teyi komesü abeni lur külen, Yarilai tangar lu majang nung tila ka alibaji sayu. "Iba alu nungjibo tsükji ruaka merumai adokjang" ta tambusang jagi moatsü. Aser kodang tsük agi jen sünga bendendir idangji nenati abenba chi nung sendakba anemtsüngji ner jen kima alangtokang. Idangji ang aluji rumatsü ta ashi.

Tambusang to anogo asemnü buba nung yim doktsür ao. Pai taodang pa tenüng nung temoatsü meshia among ka mongjang ta ashi aser ken yamai tena sayu:

*Oh longtokjangerla
Meya terok kümrota,
Meya terok mekum ta,
Endong tongyali,
Yimitsüla maongka
Wara kola mienokra,*

Alu arutsü mapang atong, temeim agi sünga aliba ayirla ana lu nung tsük kanga junga adoka amen aser alu tamenji ruaka merumai aküm aser tsük aika ruden. Kodang tena tsük agi jen sünga benden, tambusangi ashi amato tenati jen kima anemtsüng alang. Idangjiang tena alu ruma aser tena takar küma ali.

Yimer alu nung tsük tapong aser tarutsü mali aküm. Idangjiang yimer to agi alima yanglusang Lijabai par yim semdangogo ta meteta aru, saka parnok magizükba atema sasaa bilem aser Lijaba mongji amongtsü lemtet. Iba anogo nungjagi Chungliyimti nungeri Lija - mong (Tsüngrem mong) ta jateta, Lijaba nem tenüngsang agüja aser temoatsü meshia amonger.

Tsüngrem mong mapang nung tebur taintem Unger ki nungi tenzüka, amen ken tena yimsüsür ki maka jajar. Elangtsürtem metsülep sarua aji tantsülar kidang bendener kibong shia kasa lemsatsü aser iba nungjagi tenzüka yimtsü yimpu ki makyonga aotsü. Ayir asangurtem züngamen benjung amentsü aser parnok azüto ken, sangpangto ken tena tsüngsangtsü. Iba ama benjung tenzüksü mapang nung ayir asangurtem sempet tapu balala agütsütepa pelateper.

Ano tetsür tebur telok lemdanger arr atsütepa, arr ken tena longsoteper. Chungliyimti alidang tsüngrem mong ken iba amai tena tsüngsang :

Chungliyimti nunger Tsüngrem mong jazükba ken :

- *Ongtoroko pokerur.*
- *Chungliyimti künep yongyimer.*
- *Longtepsa Nangpongi. Lijaba tsüngrem mateti ta;*
- *Aba, oba, memetet Yarila na tenüng kümtati na, abutsüa melirao.*
- *Süngkong ki na menjokang ta, Chungliyimtilari Lijaba tsüngrem külemtita*
- *Sani, menürema Yarila na tsüngrem mongjia jazüksüogo ni.*

Iba otsü azünga aser kentem ya atenba ajanga tarutsü nung lanurtemi Aor Sobaliba tali tajungba angateta, parnok taküm nung tajangzüka tulu angutsü ta yimlar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Cuba nung pastor tem anema inyakba manener



July 31, 2025: Cuba nung mapang shia pastor tem anema inyaker, aser tan ita tetenzüklen-a Cuba nung pastor ka anogo ishika samaa liasü. Pastor Maikel Pupu 2021 küm July ita nung San

José de las Lajas, Mayabeque nung longkak aitba nung shilem agiba atema Marta Perdomo Benites'er jabasotem pua tepuokdak yua lir. July 7 nü Pastor-i Benites'er jala nem nashira mozü agütsüba sülen pa Perdomo Benites'er ki telungi aitsü lia soita liasü. Pai ano tangar pastor ka den phone ajanga jembiba sülen pa sama aser pa meyong phone-a switch off asü. Alliance of Christians of Cuba (ACC) nungi pastor temi pastor Velázquez bushi tenzuka hospitals, detention centers aser police stations aika sema ogo, ajisüaka pa mangu. July 10, 2025 anepdang züngia 2:00 ako meta pastor Velázquez ji par kima angu. Kari pa pua pa dang mapang talangka asüngdangyaba den külemi pa amokmerena liasü. Ibaji ajanga pa tekolok tera meshidaki kümogo.

US nung ICE-i Arogo kiojentem mita aoba anema ken o benok

July 31, 2025: US nung Tenla kitem aser Arogo meyong kiojentem mita aotsü atema Trump administration-i ICE (Immigration & Customs Enforcement) agents nem temelaba agütsüba anema Khristan organizations-i court nung temepishiba ken o ka benokogo, ta osang ka ajanga metetdaksü. Hombarnü Khristan organizations-i Massachusetts nung aliba federal court nung ken o benok aser temepishiba ken o nungji U.S. Department of Homeland Security aser DHS Secretary Kristi Noem na tenüng tetshia lir. Ozüng alema linük nung alir bendangertem mita aoba nung ajemdaker Arogo meyong kiojentem mita aotsü atema Trump administration-i federal agents nem tashi agütsür, aser ibaji ajanga Arogo aika nung züngsemtem Tenla kidangi aruba kanga ajema kümogo. Temepishiba ken o nungji yamai shia lir, "Arogotemi züngsemtem kümzüksü atema joko 'underground' kümadokogo. Baptiba sentongtem ya lokti sentong nung agia liasü, ajisüaka tangbo miimshia nija sentong ayongzüka agir." "Arogotemi joko bendangertem dak rangloker agiba ministries sentongtem yimjak nung mesangdonger aser bendangertema aikati tetsübu nung joko Tenla kidangi marur," ta Khristan organizations-i metetdaksü. Court nem temepishiba ken o agütsürtemrongnung Evangelical Lutheran Church in America, American Baptist Churches USA, Alliance of Baptists, Religious Society of Friends aser Metropolitan Community Churches densema lir. Court nung Khristian organization atema ken o jembitsürtemji legal group Democracy Forward, Washington Lawyers'

Committee for Civil Rights aser Urban Affairs & Gilbert LLP nungi lir. Democracy Forward nung Tir aser CEO, Skye Perryman-i sangdong ka ajanga, "Court nung Khristan lenirtem den külemi onoki shilem agiba atema pelar. Ozüng alema benokba mapatong ya magien tashi onoki nokdaksü," ta metetdaksü. Laisa, "Tenla kitem aser temeshi tesemtem mita aoba ya Democratic aser Republican administrations anema lir aser iba ya meimchir temeden anema lir," ta metetdaksü. Taküm April ita nunga melungtet telok ana densema Arogotem longjemer Oregon nung aliba U.S. District Court nung iba mapatong anema ken o benoka liasü. Joko tesüiba hopta ishika federal agent temi Tenla kitem mita oa Arogo züngsem masüba bendangertem bushiba anema Arogo lenirtemi ola adoker. June ita nunga ICE agent temi tejak nembanger Tenla ki mita oa nisung ka pua liasü. Parnoki Arogo nung staff tem-a amokmerena liasü. Iba tatalokba sülen Disciples of Christ Tir, Rev. Terri Hord Owens aser Pacific Southwest Region Tir, Rev. Richie Sanchez nati külem sangdong ka ajanga ICE agent tem sashia aitsü. ICE agent temi Tenla kitem mita aoba ajanga Diocese of Nashville nungbo Amongnü tekülem sentong nung adenertem shilem 50 ajema kümogo. May ita tetenzüklen ICE agent temi nisung 200 apuba sülen Tenla kidangi arurtem kanga ajema kümogo. Nashville, Memphis aser Knoxville nung putirtemi külem sangdong ka ajanga, ozüng benokba agent temi ozüng alema inyakertem, temesepba mozü shibelenertem aser nisung shilbelenertem anema inyakertem apubaji tim dang, ajisüaka ozüng alema inyakba record malir bendangertem pua ayuba ya tim masü, ta metetdaksü. June ita nungsa San Bernardino, California nung Bishop, Alberto Rojas-i Arogo kimong nung federal agent temi nisung aika arishia oa apuba aija liasü. June ita tatembanglen Los Angeles, California nunga Arogo ka nung züngsem Iran nungertem federal agents-i apu. Los Angeles nung aliba Arogo nungjagi züngsem pongu apu, aser parnok rongnung apuani den par jala tanur ka densema liasü, ta Los Angeles nung aliba Cornerstone Arogo nung pastor, Ara Torosian-i metetdaksü. Iran nung kanga Khristanem kanga reshikangshiba ajanga Pastor Ara Torosian-i Iran nungi US-i jena oa liasü. Pa lia agents-i par Arogo nung züngsemtem puer ao. Ano par Arogo nungsa züngsem apuani nata federal agents-i par kima apu. Arogo nung züngsemtem puer aoba sülen Torosian-i Amongnü tekülem sentong thinen aser Arogo nung züngsemtem dang nenok taküm kümzüksü atema Tenla kidangi marui liang ta mepishia metetdakja liasü. Anogo ishika tejaklen ang Maryland nunga ICE agent temi Easton jila nung aliba Iglesia del Nazareno Jesus Te Ama Arogo nung pastor, Daniel Fuentes Espinal pua Louisiana nung aliba federal detention facility kati anir ao. Pa tamalen Arogo ka nung youth minister inyaka liasü aser 2010 küm pai Nazarene Arogo ka nung adenba sülen küm pongu lir pa iba Arogo nungji pastor shima liasü. Espinal indang visa 'expire' sür mapang talangka, ibayongji ketdangsertemi pa apu. Tang US nung ozüng alema alir bendanger million 10 shi lir aser iba nungjagi shilem 80 shibo Khristanem lir.

ANOGO ABEN TSÜNGREM DEN

Mulungtet tashi nung agüjang
"Nisung shia Kechi koda pei temulung nung mulungtet aji oda agüjang; saka nungnanga masü, kangshia masü, kechiaser Tsüngremi pelashishia agütsüba meimer". 2 Korint 9:7
Agütsüba ya tamasa Tsüngremi kotak nung tenzük, anungji, asenok asoshi teinyaktsü tongtibangbaji, Tsüngrem nem asen taküm, rongsen aser sempet agütsütsübaji lir. Merk 12: 41-44 nung amitsür kati tenla agütsüba nungji asenoki tabensaba nung agütsüba tatishitsüji angur. Tangarbo parnok akaba rongsen nungi agütsü. Kechiaser tangarbo parnok jenti akaba rongsen nungi agütsü saka laibo la makaba nungi la akaba ajak mulungsentsü taroktiba nungi agütsü. Amitsürla-i agütsüba ya tabensaba nung agütsü kechiaser: lai mulungsoa agütsü, lai tashi anga agütsü, lai la akaba ajak Tsüngrem nem bendanga agütsü. Asen taküm, sempet aser rongsen jenti mesüaka, Tsüngrem nem temulungtetba shitak agi agütsüra, asenoki tenla agütsüba jagi Tsüngremi mapa tulu inyaktettsü. Martin Lutheri yamai ashi, 'ni kü teka nung oset/langka ayutsüba merang, ajak sama; saka Tsüngrem teka nung kechi agütsü ajak ano kar'. Kibuba Yisu, onok taküm rangben agi Ne nem agütsüba tanela lesson sayu nung Ne nem tenüngsang agütsür. Amen

Egypt nung Islam yimsü toktsür Khristan ka anema ken o benok



July 31, 2025: Egypt nung meyirjang aika temeden makai Islam yimsü toktsür Khristan akümer. Parnok maneni tetsübu nung dangi meyiper, Saeid Mansour Abdulraziq-i pa indang 2016 küm Abdulraziq-i identification papers nung Khristan yimsü agizükba sülen 'Muslim nung' ta alibaji Egypt nung aliba Russian Orthodox Church nung aden. Pa Khristan ta melenshijang, ta mepishiba sülen pa pua pa anema ken o benok. Khristan akümba sülen par kibongia pa sendoka liasü. Egypt yimtiba, Cairo nung 2018 küm pa Russia-i ao aser Abdulraziq-i pa indang mapang shia pai Islam yimsü documents nung Khristan ta aija liasü. Russia nung pa küm melentsü atema mepishiba sülen 1 tepuokdak ayuba sülen yaküm ketdangsertemi pa apu. Egypt-i meyipa yoka liasü. Cairo nung aliba Khristan Pa Egypt-i aruba sülen pai attorney Saeid Fayaz-i, "Egypt timtem kecha majangshii nung Islam yimsü toktsür aruogo, ajisüaka tawa pai pa nung Khristan yimsü dangi meyiper indang documents nung Muslim aiki kanga timtema tetsübu nung, ta alibaji Khristan ta melentsü mepishiba sülen ketdangsertemi pa apu. nung alir. Egypt nung Khristan yimsü dangi meyiper Khristan

AO OSHI ANGAZÜKDAK:
TANÜ ANGAZÜKTSÜBA OJANG



Tesaksak

(adv) tangar dang nungi tali chinüyongnüba (gluttonous, rapacious)
* Tesaksak asübaji temang nung tashidak ka lir ta metettsüla.

Tesama

(v) maka akümba, mengui aküm (lost)
* 2024 küm ya ozü lokti asoshi tesama ajuruba küm ka liasü.

OLONG PAITEP # 7225

1		2					3		4	
						5				
6				7		8				
								9		
	10			11						
12										13
			14					15		
16										
					17					

TIPIEN

- Tagitsü - (6)
- Tenüngla nembangba - (5)
- N _ _ _ sang - (3)
- Mapang shia - (4)
- Alima nungi pila - (3)
- Tagidak mali - (9)
- Mejangba nungi züshia aru - (3)
- Leptep-tsüngtep dang amshiba - (4)
- _ _ _ areth - (3)
- Magima - (5)
- Mimong nung aliba - (6)

LANGTSÜNGLEN

- Ano masü - (5)
- Ajungben - (7)
- Tapok - (3)
- Khu mali - (6)
- Meshitak - (3)
- Asangur mapang - (7)
- Temerang - (6)
- Jokshia senzüba shiruru ka - (3)
- Kaket nung aliba metettsü merang - (5)
- Teindoktsü / Tamagitsü - (4)

OLONG PAITEP # 7224 TELANGZÜBA

TIPIEN :

- Chikok, 5. Injung, 6. Koya, 7. Ajeb,
10. Artsü, 11. Belen, 12. Tera,
15. Atep, 16. Anatsü, 17. Moatsü.

LANGTSÜNGLEN :

- Inyaktet, 3. Kija, 4. Ano,
6. Korang, 8. Bilemtet, 9. Sentep,
13. Anüm, 14. Anü.

NAI-A YA METETTER MA



Hippopotamus dak asenba/aluba asentzü yabo temerem dang asür, iba jagi Engraji oshi agi Hippopotamus dang ya ano 'Blood sweater' ta-a ajar.

Gaurav-i NE nung ozüing alema nagmati shishilembaba ashishi



Guwahati, Chiteni/July 31 (Agencies): Jorhat Congress MP Gaurav Gogoi-i, Assam aser Meghalaya nung ozüing alema inyaksangshiba coal syndicate tem kümzüka ayuba atema Centre sorkar aitsüogo.

Enforcement Directorate (ED)-i April 25 nü sangdong ka ajanga parnoki iba Northeast state ana nung tesem 15 meita aoba mapang crore aika alang nagmati shishilembaba nung ochi mashi ken o sendaka aliba ngutetba metetdaksüba sülen Gogoi-i Centre sorkar aija liasü. Ken o nung billing taila aser ozüing kübok nagmati atuba ama sayur ozüing alema sen aazükba densema liasü.

"April 25 nü Enforcement Directorate-i sangdong ka

ajanga Assam aser Meghalaya nung tesem 15 meita aoba mapang ozüing kübok inyaksangshir ama mimbanger nagmati shishilembaba nung ochi mashi ken o sendaka aliba tuteta sayuogo," ta pai ashi.

Ni parliament nung sorkar dang ministry-i kechi jenjang agi? kechiba centre-i bushisüngdang masür? kechiba shinga mapur mesüra oset apuba mali? ta pai asüngdang.

Ajisüaka telangzüba dak temulung masür. Ministry-i ola madokba ya tezüdangtsüka lir, ta pai shisem.

Iba ochi mashi ken o ya Delhi aser Telangana liquor scam tem dang nungi tuluba lir. Ochi mash inyakyim apira centre-i bushisüngdang ka benoka

aibelena alirtem tangsa tang aputsüla. Iba dak alaka tajemba jenjang agira aji nüburtem ashiochtsüba aser democratic accountability mezüingmeshi ka lir, ta Gogoi-i ashi.

Iba dak sendakba nung Gogoi-i social media sabang X ajanga telangzüba tesashi ka agütsüogo. Assam-Meghalaya arrtsü nung talisa nagmati atuba dak sendakba nung ochi mashi inyakyim aika sendaka aliba ya nüburtemi tali süoki ia agi tenzükogo.

Paisa, ED-i kuli kaket aser osettem puaka ketdangsurtemi aibelena alir mapu mesür centre-i achaayangba bushisüngdang ka mamenoktsü aser iba ajanga tashishitsü aika adoker, ta ashi.

Opposition sources temi ashiba agi, yimden yimsüsüba tawabangba kübok nagmati shishilembaba nung ochi mashi inyakyim ya küm aika inyaksangshia arudar.

ED-i ashiba agi, parnoki April ita meita aoba mapang tashishitsü aketba kuli kakettem aser digital kuli tem ngutetogo. Gogoi-i Centre sorkar aitsüba dak sendakba nung Ministry of Coal mesüra Home Ministry-i telangzüba kecha magütsü.

BJP Mizoram unit-i NH-306 tarakatiba nung yanglushitsütsü mepeshi

Aizawl, Chiteni/July 31 (Agencies): BJP Mizoram unit-i Centre dang NH-306 aser NH-6 takaratiba nung yanglushitsütsü mepeshia asüngdangogo. Iba lenmang ya Mizoram atema tesendaktep asoshi kanga tongtibang lir saka tzünglu aruba ajanga raksaogo, ta BJP-i ashi.

NH-306 ya Mizoram atema ajak dang tongtibangtiba lenmang lir aser iba lenmang ajanga Mizoram ya Assam nung Silchar jila ajanga linük nung tanungba tesemtem den sendakteptsür.

BJP Mizoram state tir Dr. K. Beichhua-i, Mongolbarnü Union Road Transport and Highways (MoRTH) Minister

Nitin Gadkari den New Delhi nung ajurutepa national highway majungba ajanga Mizoram timtem indang mettedaktsüogo, ta kasa sangdong ajanga metetdaksü.

Beichhua-i, Union Minister dang ken o asadanga takaratiba nung jenjang tapet ka agitsü mepeshia metetdaksüogo.

BJP tir-isa, Tripura aser Mizoram anüolen Mamit district aser iba sülen Lunglei district and Zochachhuah aser Lawngtlai district sendakteptsü atema national highway ka yanglutsü benokogo.

Iba dak sendakba nung Gadkari-i takaratiba nung ken o bentettsütsü Beichhua nem tenangzüka agüja liasü.

Kasa mapang nung ketdangsurtemi ashiba agi, NHIDCL aser state PWD nati NH-306 kübok Sairang-Kawnpui sector nung lenmang yanglushidar.

Parnoki ashiba agi, ketdangsurtemi tenüngdakba oset bener anogoshia gari 100 dak tema yokdar, ajisüaka parnoki khen khenbo gari senzüsenpongtsü atema tenokdangba agütsür, kechiyong lenmang tang teyangludak lir.

Bodhbarnü parnoki ashiba agi, Aizawl-i aoba gari 276 Kolasib anasa Kawnpui aser Rengtekawn nung anendena lir aser Assam-i aoba gari 41 Khamrang nung anendena lir.

Mizoram-i kidanger state den arrtsü nung security akangshir

Aizawl, Chiteni/July 31 (Agencies): Mizoram Home Minister K. Sapdanga-i ashiba agi, kidanger state Assam nung tang ozüing alema sorkar ali atsünger alirtem aninba mapang item nisungtem senoka aitba nokdangtsü atema state sorkari Assam, Tripura, aser Manipur den arrtsü nung security akangshitsüogo.

Paisa, Assam sorkari ozüing alema arua aliba bendangertem puteta yoktsü atema sentong yanglur inyakba dak sendakba nung telangzüba agütsütsü asoshi sorkari Assam, Tripura, aser Manipur den arrtsü nung aliba police station, outpost aser

tongtibang entry point tem kümküma atatsü asoshi tetuyuba agütsüogo, ta ashi.

Sapdanga-i ashiba agi, Assam nung mintokba nüburtem Mizoram-i maitdaksütsü atema police station, outpost, aser arrtsü nung checkpoint temi police talila yokogo.

"Arrtsü adena nüburtem senoka aitba aser talisa kidanger state tem nungi mintokertem aitba nokdangtsü atema jenjang tapet agidar," ta pai ashi.

Iba den bendenloksema sorkari Sairang aser kidanger yimtsüngtemi officer talila

yoktsü sentong lir, kong railway station yakta inyaksangshi tenzüksü.

State-isa, Inner Line Permit (ILP) ajang ajanga benoktsü sentong lir, koba ajanga bendangertem Mizoram-i aiba azüoker.

Kasa mapang nung Young Mizo Association (YMA)-ia Mizoram sorkar dang Assam nungi mintokertem state-i senoka aitsü ana nung aliba nokdangtsü atema jenjang tapet agitsü mepeshia metetdaksüogo.

Mizoram kübok Aizawl, Kolasib, aser Mamit district aser Assam arrtsü km 164 lir.

Gaza nung chiyongtsü bushir Palestine nunger aika tepset

Deir al-Balah, Chiteni/July 31 (Agencies): Bodhbarnü Gaza Strip nung arütsü ajanga senzüba tesem ka nung chiyongtsü atatepa alir Palestine nunger nisung 48 tepset aser aika yiru, ta item nisung tasü mang agizükba mozüki kati ashi.

US Mideast envoy jembishinü akatsü atema Israel-i aoba mapang teyari oset lema agütsüba temeket nung tang tesüsa iba azüdokshi ya ajurur.

Israel mitkari amakba den tesem ajungalen mokdanga ayuba ajanga Palestine nunger nisung million ana shi aliba tesem nungya aya-wara tia tamajungtiba lir, ta lokti tentet balalai takzür.

Gaza tensa indang jembitsü asoshi US envoy Steve Witkoff ya Brehostibarnü Israel tonga arutsü.

Asürtem aser yirurtem ya Zikim Crossing nungi lir, ta Gaza City nung aliba Shifa Hospital ajanga ashi, koba northern Gaza asoshi humanitarian aid indang entry point tongtiba lir. Injang ya shiri khaloktsüar mejangja aser Israel mitkar nungia kecha shia mali, shirnoki iba crossing ya amokbanga lir.

Kangasa sashia yirur alirtem Al-Saraya Field Hospital nung khi anepalur ang mozüki tulu temi yok, aser Al-Saraya Field Hospital ajanga ashiba agi, tasü aser

yirur aliba nisung 100 dak tema parnoki anepalua liasü. Temang karbo danga mozüki temi bener ao, ta Gaza Health Ministry indang emergency service tekolakba Fares Awad-i ashi, anungji asü-amar ya timba alitsü südi ta sayur.

Mongulbar aonung nungi Bodhbar anepdang tashi Israel-i amakba nunga Palestine nunger 46 tespeta liasü, aser parnok ya timba chiyongtsü bushirtem lir, ta health ketdangsür temi ashir. Ano tanur ka densema Palestine nunger nisung tenet chiyongtsü peria achi-ajem masüba ajanga asü, ta Gaza Health Ministry ajanga ashir.

Israel mitkar temi telungpur dak dang tenük yoker ta ashir aser civilian tem asüba atema Hamas dak tai tongloktsür, kechiaser iba telok indang telungpur ya nisung aika aliba tesemtem nung ang alir.

Linük balalai kanga ajungshiba mechi Israel-i Gaza telungi international aid tali aitdaksütsü asoshi mera balala hopta tatemlen sangdonga liasü, saka ano tali nüngdaker ta aid workers temi ashir.

Integrated Food Security Phase Classification ajanga Gaza nung aya-wara lir tabo mesangdong saka tensa kanga mejungi kumogo aser tang tekeraba nung mera magira nisung jenti asütsü, ta Mongulbarnü shia liasü.

Gaza telungi teyari oset

bener odaktsüba nung ketdangsüba Israel military body, COGAT ajanga ashiba agi, Mongulbarnü trucks 220 dak tema Gaza telungi yiogo. Ajisüaka anogo ka nung trucks 500-600 nüngdaker, ta UN agencies ajanga ashir.

United Nations-i tang tashi iba strip telungi aier nem teyari oset magütsüteter, kechiaser truck sünga bener aoba ya Israel mitkari amokbanga aliba tesemtem nung nisung telok adenshia agizükmar. Ano Israel-i yaria Gaza Humanitarian Foundation ajanga aid system ka tenzükba nunga azüdokshi agi sünga lir.

May ita nungi tenzüka Israel-i Palestine nunger teyari bushirtem dak injang khaloktsüba nung nisung 1,000 dak tema takum samaogo aser item ya timta GHF anasa lir.

Israel mitkari parnok alidaki arur dak tekum dangtsü atema injang khaloktsür ta ashir aser GHF-i par armed contractors temi pepper spray dang amshir mesüra nisung tali adenshiba nungi nokdangtsü mechi tekum dangtsü atema injang khadoker ta ashir.

Linük balalai anünglen nungi teyari osettem tsükdaktsü tenzükogo, saka parcels timba Palestine nunger dang ainshitsü ashiba tesem nung tzüker aser kar Mediterranean tzyüim nung tsüker, anungji nüburtem am talep bener arutsü asoshi tzyüim nung tzyü awatsüsa akumer.



OFFICE OF THE
AO SENDEN
"Nübur Asashi" (For the People)

TENÜNGSANG AGÜTSÜR

Sungratsu yimtsüng nungi J. Yapang Imchen'er jabaso Sentianger Imchen IAS-i, Government of Nagaland indang tematiba menden, Chief Secretary tongtetba asoshi Ao Senden-i tenüngsang agütsür. Ajidang masü Nagaland Chief Minister, Dr. Neiphiu Rio-i anir tang aliba sorkari tang Chief Secretary menden tongtetsang lenir dak tamang akaba asoshia pelaba lemsateper. Tesunep, tejakleni aoba, terenlok aser yimchiyimjung nung Nagaland anitsü asoshi tulusang Tsüngremi pa nem maneni shisatsü, tashi aser anema aliba takum moajang ta sarasademtsür.

Sd/-
Marsanen Imsong
President.

Sd/-
Imtipokyim
Gen. Secy.

Trump-i Canada den shishilempa masütsü amokmerener

Washington, Chiten/July 31 (Agencies): Israel-i Gaza nung raraba tebilemstü linük balalai lemsatepba mapang United Kingdom aser France linük temi Palestine linük temeja kum daksütsü mulunga aliba sangdongba nung anidaka Canada-ia sangdong agütsüba sülen US Tir Donald Trump-i parnok den trade deal yanglutsü tasak asütsü ta ashi.

"Canada-i tangji Palestine nunger linük temeja ka asoshi bhukuma nokdaksü sangdongogo. Iba yongji parnok den Trade Deal yanglutsü kanga tasak asütsü. Oh' Canada!!!" ta Trump-i pa indang social media sapang Truth Social nung Brehostibarnü zülua liasü. Canada Ato Kilonser Mark Carney indang office nungi telangzüba kecha agüja mali.

Canada-i September ita 80 buba United Nations General Assembly mapang State of Palestine agizüktü sentong lir, ta Carney-i shir anogo ka lir Trump-i iba post ya lemsatep.

Canada aser US ya August 1 tashinung trade deal ka yanglutsü

atema jembishinüba mapang lir, aser iba anogo nungi tenzüka US-Mexico-Canada trade agreement küboki maitba Canada nunger oset ajunga nung tariff shilem 35 meshitsü Trump-i amokmerena lir. Trump indang administration den tariff ken o jembiba tang tashi junga arutar, saka anogo sükzüjkja aliba memeneptsü akok, ta Carney-i Bodhbarnü ashi.

Israel-Palestine rara nung two-state solution teimla wazüka ayutsü asoshi Palestinian statehood agizüktsü ya nüngdaker, koba mapang talangka nungi Canada nunger nükjidong liasü aser asen tenük agi ngua samaa ao, ta Carney-i ashi.

Gaza nung civ8ilian tem timtemba tali tamajungba akumer aser yimjung asoshi linük balala lungjemer mera aiba nung memonutsüla, ta pai ashi.

US tembar linük, Israel-i Gaza nung Palestine nunger kin ajunga samatsütsü meranger ta UN experts aser rights groups temi tekum dangtsü shiaka, Trump indang administration-i masetshie Israel bhukuma nokdaker.

Russia-i Ukraine nunger civilian 22 tepset

Kyiv, Chiteni/July 31 (Agencies): US Tir Donald Trump-i rara manen tashi temerenshi agütsütsü aser tariffs meshitsü ta amokmerenaka Russia-i Ukraine nunger tepuokdak tesem ka aser medical facility ka nung glide bombs aser ballistic missiles khaloktsü aser civilian aliba tesemtem nung Russia-i tanen makai amakba nung nisung 22 tepset, ta ketdangsür temi ashir.

Ukraine southeast tsütsü Zaporizhzhia region nung aliba tepuokdak tesem ka nung Russian glide bombs tesashi pezü khaloktsü ta ashir. Iba mapang tepuokdak alir nisung 17 yiru aser 80 dak tema yiru, ta ketdangsür temi ashi.

Ukraine linük tiyonglen Dnipro region nung Russian missiles temi story asem atongtepa aliba ki ka raksatsü aser anasa maternity hospital ka aser city hospital ward ka densema medical facilities raksatsü. Yangji arishi küm 23 tain mashisa tetsür ka densema nisung pezü tepset aser ti yiru, ta ketdangsür temi ashir.

Russia-i linük tesem balala

nung yimti, jila aser yimtsüng 73 nung amakba mapang nisung 22 tepset, ta Ukraine Tir Volodymyr Zelenskyy-i ashi. "Ibai memeteti aibelenba masü, asaa amakba lir," ta Zelenskyy-i Telegram nung ashi.

Küm asem raraba sülen Hombarnü Trump-i Russia Tir Vladimir Putin dang anogo 10 nungi 12 tsüngta nisung tepsetba anentsü anogo sükzüktü, koba hopta ana tejakdang anogo 50 sükzüjkja liasü. Iba tetetzü Trump-i August 7-9 tashinung yimjung maparen nung terenlok aginer.

Putin-i rara tembangtsü atema jembiaka tanen makai Ukrainian civilian tem dak bomb pokloktsüba asoshi Trump-i aiben arüja arur. Ajisüaka Kremlin-i par inyakyim memelenshir.

"Ni Tir Putin dang mepelar," ta Trump-i Scotland semdangba mapang ashi.

Trump-i anogo sükzüktüba Zelenskyy-i pela agizüka liasü. "Nisung ajaki tesunep aginer - Ukraine, Europe, United States aser alima rangben nung khuret angatetba lenirtemi. Russia dak alaka ajaki yimjung aginer," ta

Zelenskyy-i Telegram nung zülü.

Kasa mapang Putin indang lieutenant kati Russia den anogo züngzüktüba asaya masayatsü Trump dang tekum dangtsü ashi.

"Russia ya Israel mesüra Iran masü. Anogo tasen sükzüktüba ya timtem lir aser rara tsütsü mera ka lir. Russia aser Ukraine tsüngta masü, saka par linük den," ta Russia indang taoba tir aser linük indang Security Council nung deputy head, Dmitry Medvedev-i social media X nung ashi.

Russia-i tashi ajak amshia par kidanger amak tenzükba sülen Kremlin-i Kyiv yarir anüolen linüktem dang parnoki shilem agiba ajanga rara tuluba kuma NATO linüktem tashi aotsü ta tekum dangtsü ashir.

Yasüng Ukraine dak Russia-i Iskander-M ballistic missiles ana den Shahed-type strike drones and decoys 37 khaloktsü, ta Ukraine air force ajanga ashir. Ukrainian air defenses ajanga Shahed drones 32 anüng nung lia raksatsü ta ashi.

Russia-i Hombar aonung

ayatirm atongtsü lia amakdang Bilenkivska Correctional Facility nung glide bombs khaloktsü, ta State Criminal Executive Service of Ukraine ajanga ashir.

Glide bombs ya Soviet mapang yangluba bomb lir, kong retractable fins aser guidance systems inoka lir, koba Ukraine nüdoklen yimti balala nung tamajung kumer prokshia lir, kong Russian army temi Ukrainian defenses tsükpoka aitsü meranger. Iba bomb nungya tapoktsü 3,000 kilograms (6,600 pounds) shi lir.

Tepuokdak alir nisung 42 shi kanga sashia yirur mozüki nung lir aser staff züngsem ka dena nisung 40 yirua liasü.

Russia-i amakba nung iba tepuokdak chiyongba tesem, administrative aser quarantine buildings raksatsü, saka perimeter fence meraksa, anungji tepuokdak alir jena aoba osang mali, ta ketdangsür temi ashir.

Tepuokdak tesemtem ama civilian ki o jen nung tenük yoker amakba ya international conventions kübok war crime lir, ta Ukraine ketdangsür temi

ashir.

Russia-i amokbanga aliba Donetsk region nung aliba Olenivka detention facility nung bomb ka poka nisung 50 dak tema tepseter küm asem jungli iba ya ataloker.

Russia-i ano Synelnykiivskiyi district nung nisung alidak FPV drones aser aerial bombs amshia amakba nung nisung ka asü aser ana yiru, ta regional governor Serhii Lysak-i ashi.

Russian sepaitemi Velykomykhailivska nung tenük yoker amakba nunga arishi küm 75 tain tetsür ka tepset aser arishi küm 68 tain tebur ka yiru, ta Lysak-i ashi.

Russia-i amakba ama Ukraine-ia amaktsü mechi par sasa long-range drone technology yanglua oil depots, nok-nü yangluba tesem maka commercial flights nunga tetsükdaktsü agütsür.

Mongulbarnü Russia indang Defense Ministry ajanga ashiba agi, yasüng air defenses ajanga region balala nung Ukrainian drones 74 khazüka yok aser item rongnung Bryansk region nunga 43 khazüka khazüka yoka liasü.

25buba NSF Trophy Sept. 31 nü tenzüksü

Kohima, Chiteni/July 31 (TYO): 25buba NSF Martyrs' Memorial Trophy ayongzüka asayatsü atema Angami Students' Union (ASU) renema lir. Iba asayamung ya September 13 nungi October 18 tashi asayatsü

Brehostibarnü Kohima nung osangbenertem den sensaksemba mapang Steering Committee ketdangsürtem aser ASU lenirtemi, taküm iba asayamung ya Indira Gandhi Stadium Kohima aser Chümoukedima Football Stadium nung asayatsü ta metetdaksü.

Asayamung atema entry form ya August 9 nü nungi tenzüka angutsü aser form benoktsü atema tatembangbuba anogoji Au-

gust 30 asütsü ta metetdaksüogo.

Team shia atema entry fee sen 10,000 asütsü. Entry form ya NSF Office, ASU office, Sports Paradise Keziekie, Sports World Main Town, Royal Enfield High School; Medziphema - Facon Corner; Chümoukedima - G-Sports; Dimapur - Kiran Sports & Stationeries & DNSU office; Senapati - SDSA office, Mokokchung - AKM Office nung angutsü.

Taküm iba asayamung nung takok angurtem nem senpet sen lak 15 agütsütsü ta sangdongogo, kong fan tem nem asayaba anogo sempet balala agütsütsü aliba aser Player of the Tournament nem NSF-i sponsor süa two-wheeler ka agütsütsü aliba densema lir.

Trophy Tour koba March 20, 2025 nü tenzüka liasü iba kübok trophy ya Manipur aser Indo-Myanmar arrtsü nung Naga nunger aliba tesem densema NSF federating units 15 sema bener senzütsü.

Trophy Tour ya Kohima nung September 4 nü tembangtsü aser asayamung lapokba sentong magi tsüngda trophy ya NSF nem agütsütsü.

Osangbenertem den sensaksem nung Steering Committee Member Secretary Neizokhotuo Belho, Treasurer Kezhazer Angami, Media Convener Sedeneikho Shoshahie, züngsem Dievi Yano, ASU tir Diezevisie Nakhro aser NSF games & sports secretary Kevielhou Zumu nunger dena liasü.

BAMD-i lanur sempet aketertem shimteta coaching agütsütsü

Mokokchung, 31st July (TYO): Basketball Association Mokokchung District (BAMD)-i tera tonga lua sempet aketertemanitentsü ta nangzüka ama, lanur (junior boys' & girls') atema 'coaching clinic' aser tetendanga sentong ka tenzüksü lir, ta BAMD osang ka ajanga metetdaksüogo.

Iba maparen ya tawa tembanga mezüngbuba Inter High School & Higher Secondary School Annual Basketball Tournament 2025 nung junga asayartem tebur 24 aser tetsür 14 ta Association-i shima lir.

Iba coaching ya Aug 2 nungi tenzüka BAMD Basketball Court, Imkongmeren

Sports Complex, Mokokchung nung agitsü aser training-ji school-i aoba meraksatsüsa sodi mapang dang alitsü aser ibaji Durga Puja sodi tashiji aotsü.

Iba coaching akaba ajanga item lanur telok nükmen yangluba nung yaritsü aser tarutsü nung parnok yagi state aser talisa state atena oa tournament balala nung shilem agidaksütsü tejangraba nung ibai ayonger. Basketball asaya tsütsü nükmen yanglutsü nükjiding tulu yur tarutsü aoshi inyaker, anungji, iba nükjiding ataloktsü asoshi tsürabur aser school-tem nungia tenungitba aser amalitep nüngdaker, ta BAMD-isa metetdaksü.

Eugenie Bouchard asaya nungi anisüngzüker

Chiteni/July 31, 2025 (Agencies): Bodhbarnü Montreal nung Canadian Open tanabuba round nung tsükba sülen Canada tsür Eugenie Bouchard asaya nungi anenogo. Kasa asayamung nung Wimbledon champion Iga Swiatek aser Naomi Osaka nati pei tata asaya koka liasü

Tanabuba round nung Bouchard-i Switzerland tsür Belinda Bencic 6-2, 3-6, 6-4 agi makokba sülen la asaya nungi anenogo.

Hombarnü mezüngbuba round akokba sülen fan temi ano asaya ka akoktsü atema Bouchard ajungmesoa liasü.

Ajisüaka Bencic-i tatembangbuba game trok nungi pongu koka Bouchard tsükdaksü, shibai la kidang asayamung nung tatembangbuba asayaba sülen asaya nungi anisüngzüksü ta July ita shir liasü.

"Ni Montreal nung nenok jakdang tatembangbuba asaya asayaba ya kanga



jangrademtsüka lir," ta Bouchard-i ashi.

"Ni tanur asüdang item stand tem nung mener künübo iba court nung ya asayatsü imlaba aser nükjiding ayuba bilemteter. "Ni item court aser Montreal aser temeket nung aliba court tem nung asaya inet, anungji kü career longjema arur ama bilemer," ta laisa shisem.

Bouchard shiba world rankings nung jenjang pongububa tashi tua asayaogo,

pa 2014 küm Wimbledon final tonga asayaba den Australian aser French Open nung semifinal tonga asayaba sülen nüngtugu aküm.

Ajisüaka la yiruba ajanga junga masayatet, kong 2015 US Open asayaba mapa locker room alanga concussion ajangshiba aser 2021 küm tapu yirua surgery agiba densema lir.

Kasa asayamung tetsü kija asaya nung Poland tsür Swiatek-i, China tsür qualifier Guo Hanyu 6-3, 6-1 ayong ayonga koka liasü.

Swiatek-i Guo indang serve trokben break asü tanabuba round-i iogo.

Tetsür kija asaya tanga ka nung Grand Slam pezü koker aliba Japan tsür Osaka-i match point ana tashi kümzüker 4-6, 7-6 (8/6), 6-3 agi Liudmila Samsonova koka liasü.

Tanga asaya ka nung Jessica Pegula-i 7-5, 6-4 agi Greece tsür Maria Sakkari akok aser Madison Keys-i 6-2, 6-1 agi Laura Siegemund koka liasü.



Aruya aliba 24 buba Dr. T Ao Inter-District Football Championship 2025 koba August ka nungi Indira Gandhi Stadium, Kohima nung asayatsüba lir, iba asoshi Mokokchung telok pur apusoba mapang Mokokchung District Football Association (MDFA) ketdangpur densema Mokokchung SDO(C), Temsuchuba-i asayartem aser ketdangsürtem moaja flag-off sütsüba mapang tangokba noksa nung angur. Iba asayamung ya August 1-15, 2025 tashi asayatsü. District 17-i iba asayamung marok raktepba nung shilem agitsü ta angazüker. Mokokchung, 31st July, 2025

Nepal nung ICC Women's T20 World Cup 2026 Qualifier asayatsü

Chiteni/July 31, 2025 (Agencies): ICC Women's T20 World Cup 2026 Qualifier Nepal nung asayatsü shimogo. Iba asayamung ya taruba küm January 12 nungi February 16 tashi asayatsü.

2026 küm World Cup nung asayatsü atema spot pezü asoshi team ter asayatsü. WC ya England aser Wales na nung asayatsü lir.

ICC Women's T20 World Cup 2024 nung shilem agiba sülen Bangladesh aser Ireland na Qualifier nung indang indanga shilem agitsü. Thailand aser Nepal na Asia nung qualifier ajanga asayatsü maongka nguogo aser USA-a Americas region nungi qualify süogo.

Tanungba spot pongu ya regional Qualifiers ajanga shimogo, kong Africa aser Europe nungi team anana aser East Asia-Pacific region nungi team ka densema lir.

Nepal nung asayatsü aliba asayamung ya telok ana kuma lemsar asayatsü, kong team pongungu alitsü. League asayaba sülen Super Six asayatsü aser final asayatsü. Asayamung atema fixture ya mapangtong nung metetdaksütsü.

Kasa mapang nung ICC Women's T20 World Cup 2026 atema mapanglem sangdongatokogo. Iba asayamung ya June 12 nungi July 5 tashi asayatsü.

Australia den asayamung atema India U19 squad sangdongogo

Chiteni/July 31, 2025 (Agencies): Australia den taruba Under-19 asayamung atema India-i tongtibang asayartem tanaben shimogo, kong skipper Ayush Mhatre, vice-captain Vihaan Malhotra aser opener Vaibhav Sooryavanshi nunger densema lir. Parnok ya tawa England nung oa asayamung ka akokba team nung densema liasü.

India team Australian U-19 team den One Day International asem aser angu pezü asayaba asaya ana asayatsü. Mezüngbuba ODI asaya ya September 21 nü asayatsü. Iba asayamung ya October 10 nü tembangtsü.

"Junior Selection Committee-i September ita Australia nung oa asayatsü aliba asayamung atema India U19 team shimogo. India U19 team ya Australia U19 team den ODI asem aser multi-day asaya ana asayatsü," ta BCCI secretary Devajot Saikia-i ashi.

India U-19 team ya tawa England nung oa asayaogo aser parnoki ODI asayamung ya 3-2 agi akok aser Youth Tests ana ya draw nung tembanga liasü. Iba asayamung nung India nunger top order asayartemi kanga tongtibang shilem agia parnoki ODI asayamung kokogo.

BILEMDANGANG

"Meitmebang nem anishidaksürtem lendongi aier."